

# 金刚般若波罗蜜经口诀

姚秦三藏法师	鸠摩罗什	奉诏	译
唐	六祖大师	惠能	口诀
宋	天台	罗适	校刊
河北	史凤儒		重辑

夫金刚经者。无相为宗。无住为体。妙有为用。自从达摩西来。为传此经之意。令人悟理见性。只为世人不见自性。是以立见性之法。世人若了见真如本体。即不假立法。

此经读诵者无数。称赞者无边。造疏及注解者凡八百余家。所说道理。各随所见。见虽不同。法即无二。宿植上根者。一闻便了。若无宿慧者。读诵虽多。不悟佛意。是故解释圣义。断除学者疑心。若于此经。得旨无疑。不假解说。

从上如来所说善法。为除凡夫不善之心。经是圣人语。教人闻之。超凡悟圣。永息迷心。此一卷经。众生性中本有。不自见者。但读诵文字。若悟本心。始知此经不在文字。若能明了自性。方信一切诸佛从此经出。今恐世人身外觅佛。向外求经。不发内心。不持内经。故造此诀。令诸学者持内心经。了然自见清净佛心。过于数量。不可思议。后之学者。读经有疑。见此解义。疑心释然。更不用诀。所冀学者。同见矿中金性。以智慧火镕炼。矿去金存。

我释迦本师说金刚经。在舍卫国。因须菩提起问。佛大悲为说。须菩提闻法得悟。请佛与法安名。令后人依而受持。故经云。佛告须菩提。是经名为金刚般若波罗蜜。以是名字。汝当奉持。

如来所说金刚般若波罗蜜。喻法为名。其意谓何。以金刚世界之宝。其性猛利。能坏诸物。金虽至坚。羝羊角能坏。金刚喻佛性。羝羊角喻烦恼。金虽坚刚。

殺羊角能碎。佛性虽坚。烦恼能乱。烦恼虽坚。般若智能破。殺羊角虽坚。鑛铁能坏。悟此理者。了然见性。涅槃经云。见佛性不名众生。不见佛性是名众生。如来所说金刚喻者。只为世人性无坚固。口虽诵经。光明不生。外诵内行。光明齐等。内无坚固。定慧即亡。口诵心行。定慧均等。是名究竟。金在山中。山不知是宝。宝亦不知是山。何以故。为无性故。人则有性。取其宝用。得遇金师。鑿凿山破。取矿烹炼。遂成精金。随意使用。得免贫苦。四大身中佛性亦尔。身喻世界。人我喻山。烦恼喻矿。佛性喻金。智慧喻工匠。精进勇猛喻鑿凿。身世界中有人我山。人我山中有烦恼矿。烦恼矿中有佛性宝。佛性宝中有智慧工匠。用智慧工匠凿破人我山。见烦恼矿。以觉悟火烹炼。见自金刚佛性了然明净。是故以金刚为喻。因为之名也。空解不行。有名无体。解义修行。名体俱备。不修即凡夫。修即同圣智。故名金刚也。

何名般若。般若是梵语。唐言智慧。智者不起愚心。慧者有其方便。智是慧体。慧是智用。体若有慧。用智不愚。体若无慧。用愚无智。只为愚痴未悟。故修智慧以除之也。

何名波罗蜜。唐言到彼岸。到彼岸者。离生灭义。只缘世人性无坚固。于一切法上有生灭相。流浪诸趣。未到真如之地。并是此岸。要具大智慧。于一切法圆满。离生灭相。即是到彼岸。亦云心迷则此岸。心悟则彼岸。心邪则此岸。心正则彼岸。口说心行。即自法身有波罗蜜。口说心不行。即无波罗蜜。

何名为经。经者径也。是成佛之道路也。凡人欲臻斯路。当内修般若行。以至究竟。如或但能诵说。心不依行。自心则无经。实见实行。自心则有经。故此经如来号为金刚般若波罗蜜经。

### 【如是我闻】

如者指义。是者定词。阿难自称如是之法。我从佛闻。明不自说也。故言如是我闻。又我者性也。性

即我也。内外动作皆由于性。一切尽闻。故称我闻也。

### 【一时佛在舍卫国。祇树给孤独园】

言一时者。师资会遇齐集之时也。佛者是说法之主。在者欲明处所。舍卫国者。波斯匿王所在之国。只者太子名也。树是祇陀太子所施。故言祇树也。给孤独者。须达长者之异名。园者本属须达。故言给孤独园。

佛者梵语。唐言觉也。觉义有二。一者、外觉。观诸法空。二者、内觉。知心空寂。不被六尘所染。外不见人过。内不被邪迷所惑。故名觉。觉即是佛也。

### 【与大比丘众千二百五十人俱】

言与者。佛与比丘同住金刚般若无相道场。故言与也。大比丘者。是大阿罗汉故。比丘者。梵语。唐言能破六贼。故名比丘。众。多也。千二百五十人者。其数也。俱者。同处平等法会。

【尔时世尊。食时。著衣持钵。入舍卫大城。乞食。于其城中】

尔时者。当此之时。是今辰时。斋时欲至也。著衣持钵者。为显教示迹故也。入者为自城外而入也。舍卫大城者。名舍卫国丰德城也。即波斯匿王所居之城。故言舍卫大城也。言乞食者。表如来能下心于一切众生也。

【次第乞已。还至本处。饭食讫。收衣钵。洗足已。敷座而坐】

次第者。不择贫富。平等以化也。乞已者。如多乞不过七家。七家数满。更不至余家也。还至本处者。佛意制诸比丘。除请召外不得辄向白衣舍。故云尔。洗足者。如来示现顺同凡夫。故言洗足。又大乘法。不独以洗手足为净，盖净洗手足。不若净心。一念心净。则罪垢悉除矣。如来欲说法时。常仪敷旃檀座。故言敷座而坐也。

### 【时长老须菩提】

何名长老。德尊年高。故名长老。须菩提是梵语。

唐言解空也。

**【在大众中。即从座起。偏袒右肩。右膝著地。合掌恭敬而白佛言】**

随众生所坐。故云即从座起。弟子请益。行五种仪。一者、从座而起。二者、端整衣服。三者、偏袒右肩。右膝著地。四者、合掌。瞻仰尊颜。目不暂舍。五者、一心恭敬。以申问辞。

**【希有世尊】**

希有略说三义。第一希有。能舍金轮王位。第二希有。身长丈六。紫磨金容三十二相。八十种好。三界无比。第三希有。性能含吐八万四千法。三身俱圆备。以具上三义。故云希有也。世尊者。智慧超过三界。无有能及者。德高更无有上。一切咸恭敬。故曰世尊。

**【如来善护念诸菩萨。善付嘱诸菩萨】**

如来者。自真如来之本性也。护念者。以般若波罗蜜法护念诸菩萨。付嘱者。如来以般若波罗蜜法。付嘱须菩提诸大菩萨。言善护念者。令诸学人以般若智护念自身心。不令妄起憎爱。染外六尘。堕生死苦海。于自心中念念常正。不令邪起。自性如来自善护念。言善付嘱者。前念清净。付嘱后念。后念清净。无有间断。究竟解脱。如来委曲诲示众生及在会之众。当常行此。故云善付嘱也。

菩萨者。梵语。唐言道心众生。亦云觉有情。道心者。常行恭敬乃至蠢动含灵。普敬爱之。无轻慢心。故名菩萨。

**【世尊。善男子、善女人】**

善男子者。平坦心也。亦是正定心也。能成就一切功德。所往无碍也。

善女人者。是正慧心也。由正慧心。能出生一切有为无为功德也。

**【发阿耨多罗三藐三菩提心。应云何住。云何降伏其心】**

须菩提问一切发菩提心人。应云何住。云何降伏其心。须菩提见一切众生躁扰不停。犹如隙尘。摇动之心。起如飘风。念念相续。无有间断。问欲修行。如何降伏。

**【佛言。善哉。善哉。须菩提。如汝所说。如来善护念诸菩萨。善付嘱诸菩萨】**

是佛赞叹须菩提。善得我心。善得我意也。

**【汝今谛听。当为汝说】**

佛欲说法。常先戒敕。令诸听者一心静默。吾当为说。

**【善男子、善女人。发阿耨多罗三藐三菩提心。应如是住。如是降伏其心】**

阿之言无。耨多罗之言上。三之言正。藐之言遍。菩提之言知。无者。无诸垢染。上者。三界无能比。正者。正见也。遍者。一切智也。智者。知一切有情皆有佛性。但能修行。尽得成佛。三者。即是无上清净般若波罗蜜也。是以一切善男子善女人。若欲修行。应知无上菩提道。应知无上清净般若波罗蜜多法。以此降伏其心也。

**【唯然世尊。愿乐欲闻】**

唯然者。应诺之辞。愿乐者愿佛广说。令中下根机尽得开悟。乐者。乐闻深法。欲闻者。渴仰慈诲也。

**【佛告须菩提。诸菩萨摩诃萨。应如是降伏其心】**

前念清净。后念清净。名为菩萨。念念不退。虽在尘劳。心常清净。名摩诃萨。又慈悲喜舍。种种方便化度众生。名为菩萨。能化所化心无取著。是名摩诃萨。恭敬一切众生。即是降伏自心处。真者不变。如者不异。遇诸境界。心无变异。名曰真如。亦云外不假曰真。内不虚曰如。念念无差。即是降伏其心也。不虚。一本作不乱。

**【所有一切众生之类。若卵生若胎生。若湿生若化生。若有色若无色。若有想若无想。若非有想。若非无想。我皆令入无余涅槃】**

卵生者。迷性也。胎生者。习性也。湿生者。随邪性也。化生者。见趣性也。迷故造诸业。习故常流转。随邪心不定。见趣多沦坠。起心修心。妄见是非。内不契无相之理。名为有色。内心守直。不行恭敬供养。但言直心是佛。不修福慧。名为无色。不了中道。眼见耳闻。心想思惟。爱著法相。口说佛行。心不依行。名为有想。迷人坐禅。一向除妄。不学慈悲喜舍智慧方便。犹如木石。无有作用。名为无想。不著二法想。故名若非有想。求理心在。故名若非无想。烦恼万差皆是垢心。身形无数。总名众生。如来大悲普化。皆令得入无余涅槃。云多沦坠。一作堕阿鼻也。

### 【而灭度之】

如来指示三界九地众生。各有涅槃妙心。令自悟入无余。无余者。无习气烦恼也。

涅槃者。圆满清净义。灭尽一切习气。令永不生。方契此也。

度者。渡生死大海也。佛心平等。普愿与一切众生。同入圆满清净无余涅槃。同渡生死大海。同诸佛所证也。有人虽悟虽修。作有所得心者。却生我相。名为法我。除尽法我。方名灭度也。

### 【如是灭度无量无数无边众生。实无众生得灭度者】

如是者。指前法也。灭度者。大解脱也。大解脱者。烦恼及习气。一切诸业障灭尽更无有余。是名大解脱。

无量无数无边众生。元各自有一切烦恼贪嗔恶业。若不断除。终不得解脱。故言如是灭度无量无数无边众生。

一切迷人。悟得自性。始知佛不见自相。不有自智。何曾度众生。只为凡夫不见自本心。不识佛意。执著诸法相。不达无为之理。我人不除。是名众生。若离此病。实无众生得灭度者。故言妄心无处现菩提。生死涅槃本平等。何灭度之有。

**【何以故。须菩提。若菩萨有我相人相众生相寿者相。即非菩萨】**

众生佛性无有异。缘有四相。不入无余涅槃。有四相即是众生。无四相即是佛。迷即佛是众生。悟即众生是佛。迷人恃有财宝学问族姓。轻慢一切人。名我相。虽行仁义礼智信而意高自负。不行普敬。言我解行仁义礼智信。不合敬尔。名人相。好事归己。恶事施于人。名众生相。对境取舍分别。名寿者相。是谓凡夫四相。修行人亦有四相。心有能所。轻慢众生。名我相。恃持戒。轻破戒者。名人相。厌三涂苦。愿生诸天。是众生相。心爱长年而勤修福业。诸执不忘。是寿者相。有四相即是众生。无四相即是佛也。

**【复次。须菩提。菩萨于法。应无所住行于布施。所谓不住色布施。不住声香味触法布施】**

凡夫布施。只求身相端严。五欲快乐。故报尽却堕三涂。世尊大慈。教行无相布施者。不求身相端严。五欲快乐。但令内破悭心。外利益一切众生。如是相应。为不住色布施。

**【须菩提。菩萨应如是布施。不住于相】**

应如是无相心布施者。为无能施之心。不见有施之物。不分别受施之人。是名不住相布施也。

**【何以故。若菩萨不住相布施。其福德不可思量】**

菩萨行施。无所希求。其所获福德如十方虚空。不可较量。

言复次者。连前起后之辞。一说布者普也。施者散也。能普散尽心中妄念习气烦恼。四相泯绝。无所蕴积。是真布施。又说布施者。由不住六尘境界。又不有漏分别。惟当返归清净。了万法空寂。若不了此意。惟增诸业。故须内除贪爱。外行布施。内外相应。获福无量。

见人作恶。不见其过。自性不生分别。是名离相。

依教修行。心无能所。即是善法。修行人心有能所。不名善法。能所心不灭。终未得解脱。念念常行

般若智。其福无量无边。依如是修行。感得一切人天恭敬供养。是名为福德。常行不住相布施。普敬一切苍生。其功德无有边际。不可称计。

**【须菩提。于意云何。东方虚空可思量不。不也。世尊】**

缘不住相布施所得功德。不可称量。佛以东方虚空为譬喻。故问须菩提。东方虚空可思量不。不也。世尊者。须菩提言。东方虚空不可思量也。

**【须菩提。南西北方。四维上下虚空。可思量不。不也。世尊。须菩提。菩萨无住相布施。福德亦复如是不可思量】**

佛言虚空无有边际。不可度量。菩萨无住相布施。所得功德亦如虚空。不可度量。无边际也。世界中大者莫过虚空。一切性中大者莫过佛性。何以故。凡有形相者。不得名为大。虚空无形相。故得名为大。一切诸性皆有限量。不得名为大。佛性无有限量。故名为大。此虚空中无东西南北。若见东西南北。亦是住相。不得解脱。佛性本无我人众生寿者。若有此四相可见。即是众生性。不名佛性。亦所谓住相布施也。虽于妄心中说有东西南北。在理则何有。所谓东西不真。南北曷异。自性本来空寂混融。无所分别。故如来深赞不生分别也。

**【须菩提。菩萨但应如所教住】**

应者。唯也。但唯如上所说之教。住无相布施。即是菩萨也。

**【须菩提。于意云何。可以身相见如来不。不也。世尊。不可以身相得见如来】**

色身即有相。法身即无相。色身者。四大和合。父母所生。肉眼所见。法身者。无有形段。非有青黄赤白。无一切相貌。非肉眼能见。慧眼乃能见之。凡夫但见色身如来。不见法身如来。法身身等虚空。是故佛问须菩提。可以身相见如来不。须菩提知凡夫但见色身如来。不见法身如来。故言不也。世尊。不可



以身相得见如来。

**【何以故。如来所说身相。即非身相】**

色身是相。法身是性。一切善恶尽由色身。不由法身。色若作恶。法身不生善处。色身作善。法身不堕恶处。凡夫唯见色身。不见法身。不能行无住相布施。不能于一切处行平等行。不能普敬一切众生。见法身者。即能行无住相布施。即能普敬一切众生。即能修般若波罗蜜行。方信一切众生同一真性。本来清净。无有垢秽。具足恒沙妙用。

**【佛告须菩提。凡所有相。皆是虚妄。若见诸相非相。则见如来】**

如来欲显法身。说一切诸相皆虚妄。若见一切诸相虚妄不实。即见如来无相之理也。

**【须菩提白佛言。世尊。颇有众生。得闻如是言说章句。生实信不】**

须菩提问。此法甚深难信难解。末世凡夫智慧微劣。云何信入。佛答在次下。

**【佛告须菩提。莫作是说。如来灭后。后五百岁。有持戒修福者。于此章句。能生信心。以此为实。当知是人。不于一佛二佛三四五佛而种善根。已于无量千万佛所种诸善根。闻是章句。乃至一念生净信者】**

于我灭后。后五百岁。若复有人能持大乘无相戒。不妄取诸相。不造生死业。一切时中心常空寂。不被诸相所缚。即是无所住心。于如来深法。心能信入。此人所有言说。真实可信。何以故。此人不于一劫二劫三四五劫而种善根。已于无量千万亿劫种诸善根。是故如来说。我灭后。后五百岁。有能离相修行者。当知是人。不于一二三四五佛种诸善根。

何名种诸善根。略述次下。所谓于诸佛所。一心供养。随顺教法。于诸菩萨善知识师僧父母。耆年宿德尊长之前处。常行恭敬。承顺教命。不违其意。是名种诸善根。

于一切贫苦众生起慈悲心。不生轻厌。有所需求。

随力惠施。是名种诸善根。

于一切恶类。自行和柔忍辱。欢喜逢迎。不逆其意。令彼发欢喜心。息刚戾心。是名种诸善根。

于六道众生。不加杀害。不欺不贱。不毁不辱。不骑不捶。不食其肉。常行饶益。是名种诸善根。

信心者。信般若波罗蜜能除一切烦恼。信般若波罗蜜能成就一切出世功德。信般若波罗蜜能出生一切诸佛。信自身中佛性本来清净。无有染污。与诸佛佛性平等无二。信六道众生本来无相。信一切众生尽能成佛。是名清净信心也。

【须菩提。如来悉知悉见。是诸众生得如是无量福德。何以故。是诸众生。无复我相人相众生相寿者相。无法相亦无非法相】

若有人于如来灭后。发般若波罗蜜心。行般若波罗蜜行。修习悟解。得佛深意者。诸佛无不知之。若有人闻上乘法。一心受持。即能行般若波罗蜜无相无著之行。了无我人众生寿者四相。无我者。无色受想行识也。无人者。了四大不实。终归地水火风也。无众生者。无生灭心也。无寿者。我身本无。宁有寿者。四相既亡即法眼明澈。不著有无。远离二边。自心如来。自悟自觉。永离尘劳妄念。自然得福无边。无法相者。离名绝相。不拘文字也。亦无非法相者。不得言无般若波罗蜜法。若言无般若波罗蜜法。即是谤法。

【何以故。是诸众生。若心取相。则为著我人众生寿者。若取法相。即著我人众生寿者。何以故。若取非法相。即著我人众生寿者】

取此三相。并著邪见。尽是迷人。不悟经意。故修行人不得爱著如来三十二相。不得言我解般若波罗蜜法。亦不得言不得般若波罗蜜行而得成佛。

【是故不应取法。不应取非法。以是义故。如来常说。汝等比丘。知我说法。如筏喻者。法尚应舍。何况非法】

法者。是般若波罗蜜法。非法者。生天等法。般

若波罗蜜法。能令一切众生过生死大海。既得过已。尚不应住。何况生天等法而得乐著。

【须菩提。于意云何。如来得阿耨多罗三藐三菩提耶。如来有所说法耶。须菩提言。如我解佛所说义。无有定法。名阿耨多罗三藐三菩提。亦无有定法如来可说】

阿耨多罗非从外得。但心无能所即是也。祇缘对病设药。随机宜为说。何有定法乎。如来说无上正法。心本无得。亦不言不得。但为众生所见不同。如来应彼根性。种种方便开诱化导。俾其离诸执著。指示一切众生。妄心生灭不停。逐境界动。于前念瞥起。后念应觉。觉既不住。见亦不存。若尔。岂有定法为如来可说也。阿者。心无妄念。耨多罗者。心无骄慢。三者。心常在正定。藐者。心常在正慧。三菩提者。心常空寂。一念凡心顿除。即见佛性。

【何以故。如来所说法。皆不可取。不可说。非法非非法】

恐人执著如来所说文字章句。不悟无相之理。妄生知解。故言不可取。如来为化种种众生。应机随量。所有言说。亦何有定乎。学人不解如来深意。但诵如来所说教法。不了本心。终不成佛。故言不可说。口诵心不行即非法。口诵心行。了无所得。即非非法。

【所以者何。一切贤圣。皆以无为法而有差别】

三乘根性所解不同。见有深浅。故言差别。佛说无为法者。即是无住。无住即是无相。无相即无起。无起即无灭。荡然空寂。照用齐皎。鉴觉无碍。乃真是解脱佛性。佛即是觉。觉即是观照。观照即是智慧。智慧即是般若波罗蜜多。又本云圣贤说法。具一切智。万法在性。随问差别。令人心开。各自见性。

【须菩提。于意云何。若人满三千大千世界七宝以用布施。是人所得福德。宁为多不。须菩提言。甚多。世尊。何以故。是福德即非福德性。是故如来说福德多】

三千大千世界七宝持用布施。福德虽多。于性上一无利益。依摩诃般若波罗蜜多修行。令自性不堕诸有。是名福德性。心有能所。即非福德性。能所心灭。是名福德性。心依佛教。行同佛行。是名福德性。不依佛教。不能践履佛行。即非福德性。

**【若复有人。于此经中。受持乃至四句偈等。为他人说。其福胜彼】**

十二部教。大意尽在四句中。何以知其然。以诸经中赞叹。四句偈即是摩诃般若波罗蜜多。以摩诃般若为诸佛母。三世诸佛皆依此经修行。方得成佛。般若心经云。三世诸佛。依般若波罗蜜多故。得阿耨多罗三藐三菩提。从师所学曰受。解义修行曰持。自解自行是自利。为人演说是利他。功德广大。无有边际。

**【何以故。须菩提。一切诸佛及诸佛阿耨多罗三藐三菩提法。皆从此经出】**

此经者。非指此一卷之文也。要显佛性。从体起用。妙利无穷。般若者即智也。慧以方便为功。智以决断为用。即一切时中觉照心。是一切诸佛及阿耨多罗三藐三菩提法。皆从觉照生。故云此经出也。

**【须菩提。所谓佛、法者。即非佛、法】**

所说一切文字章句。如标如指。标指者。影响之义。依标取物。依指观月。月不是指。指不是物。但依经取法。经不是法。经文则肉眼可见。法则慧眼能见。若无慧眼者。但见其文。不见其法。若不见法即不解佛意。不解佛义。则诵经不成佛道。

**【须菩提。于意云何。须陀洹能作是念。我得须陀洹果不。须菩提言。不也。世尊】**

须陀洹者梵语。唐言逆流。逆生死流。不染六尘。一向修无漏业。得粗重烦恼不生。决定不受地狱畜生修罗异类之身。名须陀洹果。若了无相法。即无得果之心。微有得果之心。即不名须陀洹。故言不也。

**【何以故。须陀洹名为入流。而无所入。不入色声香味触法。是名须陀洹】**

流者。圣流也。须陀洹人也。离粗重烦恼。故得入圣流。而无所入。无得果之心也。须陀洹者。乃修行初果也。

【须菩提。于意云何。斯陀含能作是念。我得斯陀含果不。须菩提言。不也。世尊。何以故。斯陀含名一往来。而实无往来。是名斯陀含】

斯陀含者。梵语。唐言一往来。舍三界结缚。三界结尽。故名斯陀含。斯陀含名一往来。往来从天上却到人间生。从人间却生天上竟。遂出生死。三界业尽。名斯陀含果。大乘斯陀含者。目观诸境。心有一生灭。无第二生灭。故名一往来。前念起妄。后念即止。前念有著。后念即离。故实无往来。

【须菩提。于意云何。阿那含能作是念。我得阿那含果不。须菩提言。不也。世尊。何以故。阿那含名为不来。而实无不来。是故名阿那含】

阿那含梵语。唐言不还。亦名出欲。出欲者。外不见可欲之境。内无欲心可行。定不向欲界受生。故名不来。而实无不来。亦名不还。以欲习永尽。决定不来受生。是故名阿那含。

【须菩提。于意云何。阿罗汉能作是念。我得阿罗汉道不。须菩提言。不也。世尊】

诸漏已尽。无复烦恼。名阿罗汉。阿罗汉者。烦恼永尽。与物无诤。若作得果之心。即是有诤。

【何以故。实无法名阿罗汉。世尊。若阿罗汉作是念。我得阿罗汉道。即为著我人众生寿者】

阿罗汉。梵语。唐言无诤。无烦恼可断。无贪嗔可离。性无违顺。心境俱空。内外常寂。若有得果之心。即同凡夫。故言不也。

【世尊。佛说我得无诤三昧。人中最为第一。是第一离欲阿罗汉。世尊。我不作是念。我是离欲阿罗汉】

何名无诤三昧。谓阿罗汉心无生灭去来。惟有本觉常照。故名无诤三昧。三昧。梵语。此云正受。亦

云正见。远离九十六种邪见是名正见。然空中亦有明暗诤。性中有邪正诤。念念常正。无一念邪心。即是无诤三昧。修此三昧。人中最为第一。若有一念得果心。即不名无诤三昧。

【世尊。我若作是念。我得阿罗汉道。世尊即不说须菩提是乐阿兰那行者。以须菩提实无所行。而名须菩提是乐阿兰那行】

阿兰那。梵语。唐言无诤行。无诤即是清净行。清净行者。为除去有所得心也。若存有所得心。即是有诤。有诤即非清净道。常得无所得心。即是无诤行也。

【佛告须菩提。于意云何。如来昔在然灯佛所。于法有所得不。不也。世尊。如来在然灯佛所。于法实无所得】

佛恐须菩提有得法之心。为遣此疑。故问之。须菩提知法无所得。而白佛言。不也。然灯佛是释迦授记之师。故问须菩提。我于师处有法可得不。须菩提即谓法因师开示。而实无所得。但悟自性本来清净。本无尘劳。寂然常然。即自成佛。当知世尊在然灯佛所。于法实无所得。如来法者。譬如日光明照。无有边际。而不可取。

【须菩提。于意云何。菩萨庄严佛土不。不也。世尊。何以故。庄严佛土者。即非庄严。是名庄严】

清净佛土无相无形。何物而能庄严耶。唯以定慧之宝。假名庄严。事理庄严有三。

第一、庄严世间佛土。造寺写经布施供养是也。

第二、庄严见佛土。见一切人。普行恭敬是也。

第三、庄严心即佛土。心净佛土净。念念常行佛心是也。

【是故须菩提。诸菩萨摩诃萨。应如是生清净心。不应住色生心。不应住声香味触法生心。应无所住而生其心】

此修行人不应谈他是非。自言我能我解。心轻未

学。此非清净心也。自性常生智慧。行平等慈悲心。恭敬一切众生。是修行人清净心也。若不自净其心。爱著清净处。心有所住。即是著法相。见色著色。住色生心。即是迷人。见色离色。不住色生心。即是悟人。住色生心。如云蔽天。不住色生心。如空无云。日月长照。住色生心。即是妄念。不住色生心。即是真智。妄念生则暗。真智照则明。明即烦恼不生。暗则六尘竞起。

【须菩提。譬如有人。身如须弥山王。于意云何。是身为大不。须菩提言。甚大。世尊。何以故。佛说非身。是名大身】

色身虽大。内心量小。不名大身。内心量大。等虚空界。方名大身。色身纵如须弥山王。不为大也。

【须菩提。如恒河中所有沙数。如是沙等恒河。于意云何。是诸恒河沙宁为多不。须菩提言。甚多。世尊。但诸恒河尚多无数。何况其沙。须菩提。我今实言告汝。若有善男子善女人。以七宝满尔所恒河沙数三千大千世界以用布施。得福多不。须菩提言。甚多。世尊。佛告须菩提。若善男子善女人。于此经中。乃至受持四句偈等。为他人说。而此福德胜前福德】

布施七宝。得三界中富贵报。讲说大乘经典。令诸闻者生大智慧。成无上道。当知受持福德胜前七宝福德。

【复次。须菩提。随说是经。乃至四句偈等。当知此处。一切世间天人阿修罗。皆应供养。如佛塔庙】

所在之处。如有人即说是经。若念念常行无念心。无所得心。不作能所心说。若能远离诸心。常依无所得心。即此身中有如来全身舍利。故言如佛塔庙。以无所得心说此经者。感得天龙八部悉来听受。心若不清净。但为名声利益而说是经者。死堕三涂。有何利益。心若清净为说是经。令诸听者除迷妄心。悟得本来佛性。常行真实。感得天人阿修罗等皆来供养持经人也。

**【何况有人尽能受持读诵。须菩提。当知是人。成就最上第一希有之法。若是经典所在之处。即为有佛。若尊重弟子】**

自心诵得此经。自心解得经义。自心体得无著无相之理。所在之处。常修佛行。念念心无有间歇。即自心是佛。故言所在之处则为有佛。

**【尔时须菩提白佛言。世尊。当何名此经。我等云何奉持。佛告须菩提。是经名为金刚般若波罗蜜。以是名字。汝当奉持。所以者何。须菩提。佛说般若波罗蜜。即非般若波罗蜜】**

佛说般若波罗蜜。令诸学人用智慧除却愚心生灭。生灭除尽。即到彼岸。若心有所得。不到彼岸。心无一法可得。即是彼岸。口说心行。乃是到彼岸。

**【须菩提。于意云何。如来有所说法不。须菩提白佛言。世尊。如来无所说】**

佛问须菩提。如来说法。心有所得不。须菩提知如来说法。心无所得。故言无所说也。如来意者。欲令世人离有所得之心。故说般若波罗蜜法。令一切人闻之。皆发菩提心。悟无生理。成无上道。

**【须菩提。于意云何。三千大千世界所有微尘。是为多不。须菩提言。甚多。世尊。须菩提。诸微尘。如来说非微尘。是名微尘。如来说世界。非世界。是名世界】**

如来说众生性中妄念。如三千大千世界中所有微尘。一切众生被妄念微尘起灭不停。遮蔽佛性。不得解脱。若能念念真正修般若波罗蜜无著无相之行。了妄念尘劳即清净法性。妄念既无。即非微尘。是名微尘。了真即妄。了妄即真。真妄俱泯。无别有法。故云是名微尘。性中无尘劳。即是佛世界。心中有尘劳。即是众生世界。了诸妄念空寂。故云非世界。证得如来法身。普见尘刹。应用无方。是名世界。

**【须菩提。于意云何。可以三十二相见如来不。不也。世尊。不可以三十二相得见如来。何以故。如**



**来说三十二相。即是非相。是名三十二相】**

三十二相者。是三十二清净行。三十二清净行者。于五根中修六波罗蜜。于意根中修无相无为。是名三十二清净行。常修此三十二清净行即得成佛。若不修三十二相清净行。终不成佛。但爱著如来三十二相。自不修三十二相行。终不得见如来。

**【须菩提。若有善男子善女人。以恒河沙等身命布施。若复有人。于此经中。乃至受持四句偈等。为他人说。其福甚多】**

世间重者莫过于身命。菩萨为法。于无量劫中舍施身命与一切众生。其福虽多。亦不如受持此经四句之福。多劫舍身。不了空义。妄心不除。元是众生。一念持经。我人顿尽。妄想既除。言下成佛。故知多劫舍身。不如持经四句之福。

**【尔时。须菩提闻说是经。深解义趣。涕泪悲泣而白佛言。希有世尊。佛说如是甚深经典。我从昔来所得慧眼。未曾得闻如是之经。世尊。若复有人。得闻是经。信心清净。则生实相。当知是人。成就第一希有功德】**

自性不痴名慧眼。闻法自悟名法眼。须菩提是阿罗汉。于五百弟子中解空第一。已曾勤奉多佛。岂得不闻如是深法。岂于释迦牟尼佛所始言闻之。然或是须菩提于往昔所得。乃声闻慧眼。至今方悟佛意。故始得闻如是深经。悲昔未悟。故涕泪悲泣。闻经谛念。谓之清净。从清净体中。流出般若波罗蜜多深法。当知决定成就诸佛功德也。

**【世尊。是实相者。即是非相。是故如来说名实相】**

虽行清净行。若见垢净二相。当情并是垢也。即非清净心也。但心有所得。即非实相。

**【世尊。我今得闻如是经典。信解受持。不足为难。若当来世。后五百岁。其有众生得闻是经。信解受持。是人即为第一希有。何以故。此人无我相无人**

相无众生相无寿者相。所以者何。我相即是非相。人相众生相寿者相即是非相。何以故。离一切诸相。即名诸佛】

须菩提深悟佛意。盖自见业尽垢除。慧眼明彻。信解受持。即无难也。世尊在世说法之时。亦有无量众生不能信解受持。何必独言后五百岁。盖佛在之日。虽有中下根不信及怀疑者。即往问佛。佛即随宜为说。无不契悟。佛灭后。后五百岁。渐至末法。去圣遥远。但存言教。人若有疑。无处咨决。愚迷抱执。不悟无生。著相驰求。轮回诸有。于此时中得闻深经。清心敬信。悟无生理者。甚为希有。故言第一希有。

于如来灭后。后五百岁。若复有人。能于般若波罗蜜甚深经典。信解受持者。即知此人无我人众生寿者之相。无此四相是名实相。即是佛心。故曰离一切诸相。则名诸佛。

【佛告须菩提。如是。如是】

佛印可须菩提所解。善契我心。故重言如是也。

【若复有人。得闻是经。不惊不怖不畏。当知是人。甚为希有】

声闻久著法相。执有为解。不了诸法本空。一切文字皆是假立。忽闻深经。诸相不生。言下即佛。所以惊怖。唯是上根菩萨。得闻此理。欢喜受持。心无恐怖退转。如此之流。甚为希有。

【何以故。须菩提。如来说第一波罗蜜。即非第一波罗蜜。是名第一波罗蜜】

口说心不行即非。口说心行即是。心有能所即非。心无能所即是也。

【须菩提。忍辱波罗蜜。如来说非忍辱波罗蜜】

见有辱境当情。即非。不见辱境当情。即是。见有身相。当彼所害。即非。不见有身相。当彼所害。即是。

【何以故。须菩提。如我昔为歌利王割截身体。我于尔时。无我相、无人相、无众生相、无寿者相。

何以故。我于往昔节节支解时。若有我相、人相、众生相、寿者相。应生嗔恨】

如来因中在初地时。为忍辱仙人。被歌利王割截身体。无一念痛恼之心。若有痛恼之心。即生嗔恨。歌利王是梵语。此云无道极恶君也。一说如来因中。曾为国王。常行十善。利益苍生。国人歌赞此王。故云歌利王。求无上菩提。修忍辱行。尔时天帝释化作旃檀罗。乞王身肉。即割施。殊无嗔恼。今并存二说。于理俱通。

【须菩提。又念过去于五百世。作忍辱仙人。于尔所世。无我相、无人相、无众生相、无寿者相】

如来因中于五百世修忍辱波罗蜜。以得四相不生。如来自述往因者。欲令一切修行人成就忍辱波罗蜜行。行忍辱波罗蜜行者。不见一切人过恶。冤亲平等。无是无非。被他打骂残害。欢喜受之。倍加恭敬。行如是行者。即能成就忍辱波罗蜜也。

【是故须菩提。菩萨应离一切相。发阿耨多罗三藐三菩提心。不应住色生心。不应住声香味触法生心。应生无所住心】

不应住色生心者。是都标也。声香等别。列其名也。于此六尘起憎爱心。由此妄心积集无量业结。覆盖佛性。虽种种勤苦修行。不除心垢。无解脱之理。推其根本。都由色上住心。如能念念常行般若波罗蜜。推诸法空。不生执著。念念常自精进。一心守护。无令放逸。净名经云。上求一切智。无非时求。大般若经云。菩萨摩訶萨昼夜精勤。常住般若波罗蜜多。相应作意。无时暂舍。

【若心有住。则为非住】

若心住涅槃。非是菩萨住处。不住涅槃。不住诸法。一切处不住。方是菩萨住处。上文说应无所住而生其心是也。

【是故佛说菩萨心。不应住色布施。须菩提。菩萨为利益一切众生故。应如是布施。】

菩萨不为求望自身快乐而行布施。但为内破慳心。外利益一切众生而行布施也。

**【如来说一切诸相。即是非相。又说一切众生。则非众生】**

如者不生。来者不灭。不生者。我人等相不生。不灭者。觉照不灭。下文云。如来者无所从来。亦无所去。故名如来。如来说我人等相。毕竟可破坏。非真实体也。一切众生尽是假名。若离妄心。即无众生可得。故言即非众生。

**【须菩提。如来是真语者、实语者、如语者、不诳语者、不异语者】**

真语者。说一切有情无情皆有佛性。

实语者。说众生造恶业。定受苦报。

如语者。说众生修善法定有乐报。

不诳语者。说般若波罗蜜法出生三世佛。决定不虚。

不异语者。如来所说初善中善后善。旨意微妙。一切天魔外道无有能超胜及破坏佛语者也。

**【须菩提。如来所得法。此法无实无虚】**

无实者。以法体空寂。无相可得。然中有恒沙性德。用之不匮。故言无虚。欲言其实。无相可得。欲言其虚。用而无间。是故不得言无。不得言有。得无而不无。言譬不及者。其唯真智乎。若不离相修行。无由臻此。

**【须菩提。若菩萨心住于法而行布施。如人入闇。即无所见】**

于一切法。心有住著。则不了三轮体空。如盲者处闇。无所晓了。华严经云。声闻在如来会中闻法。如盲如聋。为住诸法相故也。

**【若菩萨心不住法而行布施。如人有目。日光明照。见种种色】**

若菩萨常行般若波罗蜜多无著无相行。如人有目。处于皎日之中。何所不见也。

**【须菩提。当来之世。若有善男子善女人。能于此经。受持读诵。则为如来以佛智慧。悉知是人。悉见是人。皆得成就无量无边功德】**

当来之世者。如来灭后。后五百岁。浊恶之世。邪法竞起。正法难行。于此时中。若有善男子善女人得遇此经。从师禀受。读诵在心。精进不忘。依义修行。悟入佛之知见。则能成就阿耨菩提。以是三世诸佛无不知之。

**【须菩提。若有善男子善女人。初日分以恒河沙等身布施。中日分复以恒河沙等身布施。后日分亦以恒河沙等身布施。如是无量百千万亿劫以身布施。若复有人闻此经典。信心不逆。其福胜彼。何况书写受持读诵。为人解说】**

佛说末法之时。得闻此经。信心不逆。四相不生。即是佛之知见。此人功德胜前多劫舍身功德。百千万亿不可譬喻。一念闻经。其福尚多。何况更能书写受持为人解说。当知此人决定成就阿耨多罗三藐三菩提。所以种种方便。为说如是甚深经典。俾离诸相。得阿耨多罗三藐三菩提。所得福德无有边际。盖缘多劫舍身。不了诸法本空。心有能所。未离众生之见。如能闻经悟道。我人顿尽。言下即佛。将舍身有漏之福。比持经无漏之慧。实不可及。故虽十方聚宝。三世舍身。不如持经四句偈。

法云。心有能所四字。一本云。有能舍所舍心。有元来未离众生之见。此解意又分明。故两存之。

**【须菩提。以要言之。是经有不可思议、不可称量、无边功德】**

持经之人。心无我所。无我所故。是为佛心。佛心功德。无有边际。故言不可称量。

**【如来为发大乘者说。为发最上乘者说】**

大乘者。智慧广大。善能建立一切法。最上乘者。不见垢法可厌。不见净法可求。不见众生可度。不见涅槃可证。不作度众生心。不作不度众生心。是名最

上乘。亦名一切智。亦名无生忍。亦名大般若。

【若有人能受持读诵。广为人说。如来悉知是人。悉见是人。皆得成就不可量、不可称、无有边、不可思议功德。如是人等。即为荷担如来阿耨多罗三藐三菩提】

若有人发心求佛无上道。闻此无相无为甚深之法。即当信解受持。为人解说。令其深悟。不生毁谤。得大忍力。大智慧力。大方便力。方能流通此经也。

上根之人。闻此经典。得深悟佛意。持自心经。见性究竟。复起利他之行。能为人解说。令诸学者。自悟无相理。得见本性如来。成无上道。当知说法之人所得功德。无有边际。不可称量。闻经解义。如教修行。复能广为人说。令诸众生得悟修行无相无著之行。以能行此行。有大智慧光明。出离尘劳。虽离尘劳。不作离尘劳之念。即得阿耨多罗三藐三菩提。故名荷担如来。当知持经之人。自有无量无边不可思议功德。

【何以故。须菩提。若乐小法者。著我见人见众生见寿者见。即于此经。不能听受读诵。为人解说】

何名乐小法者。为二乘声闻人乐小果不发大心。故即于如来深法。不能受持读诵。为人解说。

【须菩提。在在处处若有此经。一切世间天人阿修罗所应供养。当知此处则为是塔。皆应恭敬。作礼围绕。以诸华香而散其处】

若人口诵般若。心行般若。在在处处常行无为无相之行。此人所在之处。如有佛塔。感得一切天人各持供养。作礼恭敬。与佛无异。能受持经者。是人心中自有世尊。故云如佛塔庙。当知所得福德。无量无边。

【复次。须菩提。若善男子善女人。受持读诵此经。若为人轻贱。是人先世罪业。应堕恶道。以今世人轻贱故。先世罪业则为消灭。当得阿耨多罗三藐三菩提】

佛言持经之人。如得一切天人恭敬供养。为前生有重业障故。今生虽得受持诸佛如来甚深经典。常被人轻贱。不得人恭敬供养。自以受持经典故。不起人我等相。不问冤亲。常行恭敬。心无恼恨。荡然无所计较。念念常行般若波罗蜜行。曾无退转。以能如是修行故。得无量劫以至今生所有极恶罪障。并能消灭。

又约理而言。先世即是前念妄心。今世即是后念觉心。以后念觉心轻贱前念妄心。妄不得住。故云先世罪业即为消灭。妄念既灭。罪业不成。即得菩提也。

【须菩提。我念过去无量阿僧祇劫。于然灯佛前。得值八百四千万亿那由他诸佛。悉皆供养承事。无空过者。若复有人于后末世。能受持读诵此经。所得功德。于我所供养诸佛功德。百分不及一。千万亿分。乃至算数譬喻所不能及】

供养恒沙诸佛。施宝满三千界。舍身如微尘数。种种福德不及持经一念悟无生理。息希望心。远离众生颠倒知见。即到波罗蜜彼岸。永出三涂。证无余涅槃也。

【须菩提。若善男子善女人。于后末世。有受持读诵此经。所得功德。我若具说者。或有人闻。心则狂乱。狐疑不信】

佛言。末法众生。德薄垢重。嫉妒弥深。邪见炽盛。于此时中。如有善男子善女人受持读诵此经。圆成法相。了无所得。念念常行慈悲喜舍。谦下柔和。究竟成就无上菩提。或有人不知如来正法常住不灭。闻说如来灭后。后五百岁。有人能成就无相心。行无相行。得阿耨多罗三藐三菩提。则必心生惊怖。狐疑不信。

【须菩提。当知是经义不可思议。果报亦不可思议】

是经义者。即无著无相行也。云不可思议者。赞叹无著无相行。能成就阿耨多罗三藐三菩提也。

【尔时须菩提白佛言。世尊。善男子善女人。发

阿耨多罗三藐三菩提心。云何应住。云何降伏其心。佛告须菩提。善男子善女人。发阿耨多罗三藐三菩提心者。当生如是心。我应灭度一切众生。灭度一切众生已。而无有一众生实灭度者】

须菩提问佛。如来灭后后五百岁。若有人发阿耨多罗三藐三菩提心。依何法而住。如何降伏其心。佛言当发度脱一切众生心。度脱一切众生。尽得成佛已。不得见有一众生是我灭度者。何以故。为除能所心。除有众生心。亦除我见心也。

【何以故。须菩提。若菩萨有我相、人相、众生相、寿者相。则非菩萨】

菩萨若见有众生可度者。即是我相。有能度众生心。即是人相。谓涅槃可求。即是众生相。见有涅槃可证。即是寿者相。有此四相。即非菩萨也。

【所以者何。须菩提。实无有法发阿耨多罗三藐三菩提心者】

有法者。我人等四法是也。不除四法。终不得菩提。若言我发菩提心者。亦是我人等法。我人等法。是烦恼根本。

【须菩提。于意云何。如来于然灯佛所。有法得阿耨多罗三藐三菩提不。不也。世尊。如我解佛所说义。佛于然灯佛所。无有法得阿耨多罗三藐三菩提。佛言。如是如是】

佛告须菩提。我于师处。不除四相。得授记不。须菩提深解无相之理。故言不也。善契佛意。故佛言。如是如是。言是。即印可之辞也。

【须菩提。实无有法如来得阿耨多罗三藐三菩提。须菩提。若有法如来得阿耨多罗三藐三菩提者。然灯佛则不与我授记。汝于来世。当得作佛。号释迦牟尼。以实无有法得阿耨多罗三藐三菩提。是故然灯佛与我授记。作是言。汝于来世。当得作佛。号释迦牟尼。何以故。如来者。即诸法如义】

佛言。实无我人众生寿者。始得受菩提记。我若



有发菩提心。然灯佛则不与我授记。以实无所得。然灯佛始与我授记。此一段文。总成须菩提无我义。佛言。诸法如义者。诸法即是色声香味触法。于此六尘中善能分别而本体湛然。不染不著。曾无变异。如空不动。圆通莹澈。历劫常存。是名诸法如义。菩萨璎珞经云。毁誉不动。是如来行。入佛境界经云。诸欲不染故。敬礼无所观。

**【若有人言。如来得阿耨多罗三藐三菩提。须菩提。实无有法。佛得阿耨多罗三藐三菩提。须菩提。如来所得阿耨多罗三藐三菩提。于是中无实无虚】**

佛言。实无所得心而得菩提。以所得心不生。是故得菩提。离此心外。更无菩提可得。故言无实也。所得心寂灭。一切智本有。万行悉圆备。恒沙德性。用无乏少。故言无虚也。

**【是故如来说一切法。皆是佛法。须菩提。所言一切法者。即非一切法。是故名一切法】**

能于诸法心无取舍亦无能所。炽然建立一切法。而心常空寂。故知一切法皆是佛法。恐迷者贪著一切生为佛法。为遣此病。故言即非一切法。心无能所。寂而常照。定慧齐行。体用一致。是故名一切法。

**【须菩提。譬如人身长大。须菩提言。世尊。如来说人身长大。则为非大身。是名大身】**

如来说人身长大。则为非大身者。以显一切众生法身不二。无有限量。是名大身。法身本无处所。故言则非大身。又以色身虽大。内无智慧。即非大身。色身虽小。内有智慧。得名大身。虽有智慧。不能依行。即非大身。依教修行。悟入诸佛无上知见。心无能所限量。是名大身也。

**【须菩提。菩萨亦如是。若作是言。我当灭度无量众生。则不名菩萨】**

菩萨若言由我说法。除得彼人烦恼。即是法我。若言我度得众生。即有所得。虽度脱众生。心有能所。我人不除。不得名为菩萨。炽然说种种方便。化度众

生。心无能所。即是菩萨也。

【何以故。须菩提。实无有法。名为菩萨。是故佛说一切法。无我无人无众生无寿者。须菩提。若菩萨作是言。我当庄严佛土。是不名菩萨。何以故。如来说庄严佛土者。即非庄严。是名庄严】

菩萨若言我能建立世界者。即非菩萨。虽然建立世界。心有能所。即非菩萨。炽然建立世界。能所心不生。是名菩萨。最胜妙定经云。假使有人造得白银精舍满三千大千世界。不如一念禅定心。心有能所。即非禅定。能所不生。是名禅定。禅定即是清净心也。

【须菩提。若菩萨通达无我法者。如来说名真是菩萨】

于诸法相。无所滞碍。是名通达。不作解法心。是名无我法。无我法者。如来说名真是菩萨。随分行持亦得名为菩萨。然未为真菩萨。解行圆满。一切能所心尽。方得名真是菩萨。

【须菩提。于意云何。如来有肉眼不。如是。世尊。如来有肉眼。须菩提。于意云何。如来有天眼不。如是。世尊。如来有天眼。须菩提。于意云何。如来有慧眼不。如是。世尊。如来有慧眼。须菩提。于意云何。如来有法眼不。如是。世尊。如来有法眼。须菩提。于意云何。如来有佛眼不。如是。世尊。如来有佛眼】

一切人尽有五眼。为迷所覆。不能自见。故佛教除却迷心。即五眼开明。念念修行般若波罗蜜法。初除迷心。名为第一肉眼。见一切众生皆有佛性。起怜愍心。是名第二天眼。痴心不生。名为第三慧眼。著法心除。名为第四法眼。细惑永尽。圆明遍照。名为第五佛眼。又云见色身中有法身。名为天眼。见一切众生各具般若性。名为慧眼。见性明彻。能所永除。一切佛法本来自备。名为法眼。见般若波罗蜜能生三世一切法。名为佛眼。

【须菩提。于意云何。如恒河中所有沙。佛说是

沙不。如是。世尊。如来说是沙。须菩提。于意云何。如一恒河中所有沙。有如是沙等恒河。是诸恒河所有沙数。佛世界如是。宁为多不。甚多。世尊】

恒河者。西国祇园精舍侧近河。如来说法。指此河为喻。佛说此河中沙。一沙况一世界。以为多不。须菩提言。甚多。世尊。佛举此众多国土者。欲明其中所有众生。一一众生皆有若许心数也。

【佛告须菩提。尔所国土中。所有众生。若干种心。如来悉知。何以故。如来说诸心皆为非心。是名为心】

尔所国土中所有众生。一一众生皆有若干差别心数。心数虽多。总名妄心。识得妄心非心。是名为心。此心即真心、常心、佛心、般若波罗蜜心、清净菩提涅槃心。

【所以者何。须菩提。过去心不可得。现在心不可得。未来心不可得】

过去心不可得者。前念妄心瞥然已过。追寻无有处所。现在心不可得者。真心无相。凭何得见。未来心不可得者。本无可得。习气已尽。更不复生。了此三心皆不可得。是名为佛。

【须菩提。于意云何。若有人满三千大千世界七宝以用布施。是人以是因缘。得福多不。如是。世尊。此人以是因缘。得福甚多。须菩提。若福德有实。如来说得福德多。以福德无故。如来说得福德多】

七宝之福。不能成就佛果菩提。故言无也。以其无量数限。故名曰多。如能超过。即不说多也。

【须菩提。于意云何。佛可以具足色身见不。不也。世尊。如来不应以具足色身见。何以故。如来说具足色身。即非具足色身。是名具足色身】

佛意恐众生不见法身。但见三十二相。八十种好紫磨金耀。以为如来真身。为遣此迷。故问须菩提。佛可以具足色身见不。三十二相即非具足色身。内具三十二净行。是名具足色身。净行者即六波罗蜜是也。

于五根中修六波罗蜜。于意根中定慧双修。是名具足色身。徒爱如来三十二相。内不行三十二净行。即非具足色身。不爱如来色身。能自持清净行。亦名得具足色身。

**【须菩提。于意云何。如来可以具足诸相见不。不也。世尊。如来不应以具足诸相见。何以故。如来说诸相具足。即非具足。是名诸相具足】**

如来者。即无相法身是也。非肉眼所见。慧眼乃能见之。慧眼未明具足。生我人等相。以观三十二相为如来者。即不名为具足也。慧眼明彻。我人等相不生。正智光明常照。是名诸相具足。三毒未泯。言见如来真身者。固无此理。纵能见者。只是化身。非真实无相之法身也。

**【须菩提。汝勿谓如来作是念。我当有所说法。莫作是念。何以故。若人言如来有所说法。即为谤佛。不能解我所说故。须菩提。说法者。无法可说。是名说法】**

凡夫说法。心有所得。故告须菩提。如来说法。心无所得。凡夫作能解心说。如来语默皆如。所发言辞。如响应声。任用无心。不同凡夫作生灭心说。若言如来说法。心有生灭者。即为谤佛。维摩经云。真说法。无说无示。听法者。无闻无得。了万法空寂。一切名言皆是假立。于自空性中炽然建立一切言辞演说。诸法无相无为。开导迷人。令见本性。修证无上菩提。

**【尔时。慧命须菩提白佛言。世尊。颇有众生。于未来世。闻说是法。生信心不。佛告须菩提。彼非众生。非不众生。何以故。须菩提。众生众生者。如来说非众生。是名众生】**

灵幽法师加此。尔时慧命须菩提以下六十二字。是长庆二年。今现在濠州钟离寺石碑上。记六祖解在前。故无解。今亦存之。

**【须菩提白佛言。世尊。佛得阿耨多罗三藐三菩**

提。为无所得耶。佛言。如是如是。须菩提。我于阿耨多罗三藐三菩提。乃至无有少法可得。是名阿耨多罗三藐三菩提】

须菩提言。所得心尽。即是菩提。佛言如是如是。我于菩提实无希求心。亦无所得心。以如是故。得名阿耨多罗三藐三菩提。

【复次。须菩提。是法平等。无有高下。是名阿耨多罗三藐三菩提。以无我无人无众生无寿者。修一切善法。则得阿耨多罗三藐三菩提】

此菩提法者。上至诸佛。下至昆虫。尽含种智。与佛无异。故言平等。无有高下。以菩提无二故。但离四相。修一切善法。则得菩提。若不离四相。虽修一切善法。转增我人欲证解脱之心。无由可了。若离四相。修一切善法。解脱可期。修一切善法者。于一切法。无有染著。对一切境不动不摇。于出世法。不贪不著不爱。于一切处常行方便。随顺众生。使之欢喜信服。为说正法。令悟菩提。如是始名修行。故言修一切善法。

【须菩提。所言善法者。如来说即非善法。是名善法】

修一切善法。希望果报。即非善法。六度万行炽然俱作。心不望报。是名善法。

【须菩提。若三千大千世界中。所有诸须弥山王。如是等七宝聚。有人持用布施。若人以此般若波罗蜜经。乃至四句偈等。受持读诵。为他人说。于前福德。百分不及一。百千万亿分。乃至算数譬喻所不能及】

大铁围山。高广二百二十四万里。小铁围山。高广一百一十二万里。须弥山高广三百三十六万里。以此名为三千大千世界。就理而言。即贪嗔痴妄念各具一千也。如尔许山尽如须弥。以况七宝数持用布施。所得福德。无量无边。终是有漏之因。而无解脱之理。摩诃般若波罗蜜多四句经文虽少。依之修行。即得成佛。是知持经之福。能令众生证得菩提。故不可比。

**【须菩提。于意云何。汝等勿谓如来作是念。我当度众生。须菩提。莫作是念。何以故。实无有众生如来度者。若有众生如来度者。如来则有我人众生寿者】**

须菩提意谓如来有度众生心。佛为遣须菩提如是疑心。故言莫作是念。一切众生本自是佛。若言如来度得众生成佛。即为妄语。以妄语故。即是我人众生寿者。此为遣我所心也。夫一切众生虽有佛性。若不因诸佛说法。无由自悟。凭何修行。得成佛道。

**【须菩提。如来说有我者。则非有我。而凡夫之人以为有我。须菩提。凡夫者。如来说即非凡夫。是名凡夫】**

如来说有我者是自性清净。常乐我净之我。不同凡夫贪嗔无明虚妄不实之我。故言凡夫之人以为有我。有我人者即是凡夫。我人不生即非凡夫。心有生灭即是凡夫。心无生灭即非凡夫。不悟般若波罗蜜多即是凡夫。若悟般若波罗蜜多即非凡夫。心有能所即是凡夫。心无能所即非凡夫。

**【须菩提。于意云何。可以三十二相观如来不。须菩提言。如是如是。以三十二相观如来。佛言。若以三十二相观如来者。转轮圣王则是如来。须菩提白佛言。世尊。如我解佛所说义。不应以三十二相观如来】**

世尊大慈。恐须菩提执相之病未除。故作此问。须菩提未知佛意。乃言如是。如是之言。早是迷心。更言以三十二相观如来。又是一重迷心。离真转远。故如来为说。除彼迷心。若以三十二相观如来者。转轮圣王即是如来。转轮圣王虽有三十二相。岂得同如来。世尊引此言者。以遣须菩提执相之病。令其所悟深澈。须菩提被问。迷心顿释。故云如我解佛所说义。不应以三十二相观如来。须菩提是大阿罗汉。所悟甚深得方便。不生迷路。以冀世尊除遣细惑。令后世众生所见不谬也。

**【尔时世尊而说偈言。若以色见我。以音声求我。是人行邪道。不能见如来】**

若以两字。是发语之端。色者相也。见者识也。我者。是一切众生身中自性清净。无为无相真常之体。不可高声念佛而得成就。念须正念分明。方得悟解。若以色声求之。不可见也。是知于相中观佛。声中求法。心有生灭。不悟如来矣。

**【须菩提。汝若作是念。如来不以具足相故。得阿耨多罗三藐三菩提。须菩提。莫作是念。如来不以具足相故。得阿耨多罗三藐三菩提。须菩提。汝若作是念。发阿耨多罗三藐三菩提心者。说诸法断灭相。莫作是念。何以故。发阿耨多罗三藐三菩提心者。于法不说断灭相】**

须菩提闻说真身离相。便谓不修三十二净行而得菩提。佛语须菩提。莫言如来不修三十二净行而得菩提。汝若言不修三十二净行得阿耨菩提者。即是断佛种性。无有是处。

**【须菩提。若菩萨以满恒河沙等世界七宝持用布施。若复有人。知一切法无我。得成于忍。此菩萨胜前菩萨所得功德。何以故。须菩提。以诸菩萨不受福德故。须菩提白佛言。世尊。云何菩萨不受福德。须菩提。菩萨所作福德。不应贪著。是故说不受福德】**

通达一切法。无能所心。是名为忍。此人所得福德。胜前七宝福德。菩萨所作福德。不为自己。意在利益一切众生。故言不受福德。

**【须菩提。若有人言。如来若来若去。若坐若卧。是不解我所说义。何以故。如来者。无所从来。亦无所去。故名如来】**

如来非来非不来。非去非不去。非坐非不坐。非卧非不卧。行住坐卧四威仪中。常在空寂。即是如来也。

**【须菩提。若善男子善女人。以三千大千世界。碎为微尘。于意云何。是微尘众。宁为多不。须菩提**

言。甚多。世尊。何以故。若是微尘众实有者。佛则不说是微尘众。所以者何。佛说微尘众。即非微尘众。是名微尘众】

佛说三千大千世界。以喻一切众生性上微尘之数。如三千大千世界中所有微尘。一切众生性上妄念微尘。即非微尘者。闻经悟道。觉慧常照。趣向菩提也。念念不住。常在清静。如是清静微尘。是名微尘众。

【世尊。如来所说三千大千世界。则非世界。是名世界】

三千者。约理而言。则贪嗔痴妄念各具一千数也。心为善恶之本。能作凡作圣。其动静不可测度。广大无边。故名大千世界。

【何以故。若世界实有者。则是一合相。如来说一合相。则非一合相。是名一合相】

心中明了。莫过悲智二法。由此二法而得菩提。说一合相者。心有所得故。即非一合相。心无所得。是名一合相。一合相者。不坏假名而谈实相。

【须菩提。一合相者。即是不可说。但凡夫之人。贪著其事】

由悲智二法成就佛果菩提。说不可尽。妙不可言。凡夫之人贪著文字事业。不行悲智二法。若不行悲智二法而求无上菩提。何由可得。

【须菩提。若人言。佛说我见人见众生见寿者见。须菩提。于意云何。是人解我所说义不。不也。世尊。是不解如来所说义。何以故。世尊说我见人见众生见寿者见。即非我见人见众生见寿者见。是名我见人见众生见寿者见】

如来说此经者。令一切众生。自悟般若智慧。自修行菩提果。凡夫人不解佛意。便谓如来说我人等见。不知如来说甚深无相无为般若波罗蜜法。如来所说我人等见。不同凡夫我人等见。如来说一切众生皆有佛性。是真我见。说一切众生有无漏智。性本自具足。是人见。说一切众生本自无烦恼。是众生见。说一切



众生。性本不生不灭。是寿者见。

【须菩提。发阿耨多罗三藐三菩提心者。于一切法。应如是知、如是见、如是信解。不生法相。须菩提。所言法相者。如来说即非法相。是名法相】

发菩提心者。应见一切众生皆有佛性。应见一切众生无漏种智本自具足。应信一切众生本无烦恼。应信一切众生自性本无生灭。虽行一切智慧。方便接物利生。不作能所之心。口说无相法而心有能所。即非法相。口说无相法。心行无相行。而能所心灭。是名法相也。

【须菩提。若有人以满无量阿僧祇世界七宝。持用布施。若有善男子善女人。发菩提心者。持于此经。乃至四句偈等。受持读诵。为人演说。其福胜彼。云何为人演说。不取于相。如如不动】

七宝福虽多。不如有人发菩提心受持此经四句。为人演说。其福胜彼百千万亿。不可譬喻。说法善巧方便。观根应量。种种随宜。是名人演说。所听法人有种种相貌不等。不得作分别之心。但了空寂如如之心。无所得心。无胜负心。无希望心。无生灭心。是名如如不动也。

【何以故。一切有为法。如梦幻泡影。如露亦如电。应作如是观】

梦者是妄身。幻者是妄念。泡者是烦恼。影者是业障。梦幻泡影业。是名有为法。若无为法。则真实离名相。悟者无诸业。

【佛说是经已。长老须菩提及诸比丘、比丘尼。优婆塞、优婆夷。一切世间天、人、阿修罗。闻佛所说。皆大欢喜。信受奉行】

## 六祖口诀后序

法性圆寂。本无生灭。因有生念。遂有生缘。故天得命之以生。是故谓之命。天命既立。真空入有。

前日生念转而为意识。意识之用。散而为六根。六根各有分别。中有所总持者。是故谓之心。心者。念虑之所在也。神识之所含也。真妄之所共处者也。当凡夫圣贤几会之地也。一切众生自无始来。不能离生灭者。皆为此心所累。故诸佛惟教人了此心。此心了即见自性。见自性则是菩提也。此在性时皆自空寂。而湛然若无。缘有生念而后有者也。有生则有形。形者地水火风之聚沫者也。以血气为体。有生者之所托也。血气足则精足。精足则生神。神足则生妙用。然则妙用者。即是在吾圆寂时之真我也。因形之遇物。故见之于作为而已。但凡夫迷而逐物。圣贤明而应物。逐物者自彼。应物者自我。自彼者著于所见。故觅轮回。自我者当体常空。故万劫如一。合而观之。皆心之妙用也。是故当其未生之时。所谓性者。圆满具足。空然无物。湛乎自然。其广大与虚空等。往来变化一切自由。天虽欲命我以生。其可得乎。天犹不能命我以生。况于四大乎。况于五行乎。既有生念。又有生缘。故天得以生命我。四大得以气形我。五行得以数约我。此有生者之所以有灭也。然则生灭则一。在凡夫圣贤之所以生灭则殊。凡夫之人。生缘念有。识随业变。习气薰染。因生愈甚。故既生之后。心著诸妄。妄认四大以为我身。妄认六亲以为我有。妄认色声以为快乐。妄认尘劳以为富贵。心自知见。无所不妄。诸妄既起。烦恼万差。妄念夺真。真性遂隐。人我为主。真识为客。三业前引。百业后随。流浪生死。无有涯际。生尽则灭。灭尽复生。生灭相循。至堕诸趣。在于诸趣转转不知。愈恣无明。造诸业罢。遂至尘沙劫尽。不复人身。圣贤则不然。圣贤生不因念。应迹而生。欲生则生。不待彼命。故既生之后。圆寂之性。依旧湛然。无体相无挂碍。其照万法。如青天白日。无毫发隐滞。故建立一切善法遍于沙界。不见其少。摄受一切众生皈于寂灭。不以为多。驱之不能来。逐之不能去。虽托四大为形。五行为养。皆我所假。未

尝妄认。我迹当灭。委而去之。如来去耳。于我何与哉。是故凡夫有生则有灭。灭者不能不生。圣贤有生亦有灭。灭者归于真空。是故凡夫生灭。如身中影。出入相随。无有尽时。圣贤生灭。如空中雷。自发自止。不累于物。世人不知生灭之如此。而以生灭为烦恼大患。盖不自觉也。觉则见生灭如身上尘。当一振奋耳。何能累我性哉。

昔我如来以大悲心。悯一切众生。迷错颠倒。流浪生死之如此。又见一切众生。本有快乐自在性。皆可修证成佛。欲一切众生。尽为圣贤生灭。不为凡夫生灭。犹虑一切众生无始以来流浪日久。其种性已差。未能以一法速悟。故为说八万四千法门。门门可入。皆可到真如之地。每说一法门。莫非丁宁实语。欲使一切众生各随所见法门。入自心地。到自心地。见自性佛。证自身佛。即同如来。是故如来于诸经说有者。欲使一切众生睹相生善。说无者。欲使一切众生离相见性。所说色空。亦复如是。然而众生执著。见有非真有。见无非真无。其见色见空。皆如是执著。复起断常二见。转为生死根蒂。不示以无二法门。又将迷错颠倒。流浪生死。甚于前日。故如来又为说大般若法。破断常二见。使一切众生知真有真无。真色真空本来无二。亦不远人。湛然寂静。只在自己性中。但以自己性智慧照破诸妄。则晓然自见。是故大般若经六百卷。皆如来为菩萨果人说佛性。然而其间犹有为顿渐者说。惟金刚经为发大乘者说。为发最上乘者说。是故其经先说四生四相。次云凡所有相皆是虚妄。若见诸相非相。即见如来。盖显一切法。至无所住。是为真谛。故如来于此经。凡说涉有即破之。以非直取实相以示众生。盖恐众生不解所说。其心反有所住故也。如所谓佛法即非佛法之类是也。是故六祖大师。于五祖传衣付法之际。闻说此经云。应无所住而生其心。言下大悟。是为第六祖。如来云一切诸佛及诸佛阿耨多罗三藐三菩提法。皆从此经出。其信乎哉。

适少观坛经。闻六祖由此经见性。疑必有所演说。未之见也。及知曹州济阴。于邢君固处得六祖口诀一本。观其言简辞直。明白利断。使人易晓而不惑。喜不自胜。又念京东河北陕西人。资性质朴信厚。遇事决裂。若使学佛性。必能勇猛精进。超越过人。然其为讲师者。多传百法论。上生经而已。其学者不知万法随缘生。缘尽法亦应灭。反以法为法。固守执著。遂为法所缚。死不知解。犹如陷沙之人。力与沙争。愈用力而愈陷。不知勿与沙争。即能出陷。良可惜也。适遂欲以六祖金刚经口诀。镂板流传。以开发此数方学者佛性。然以文多脱误。因广求别本刊校。十年间凡得八本。惟杭越建陕四本文多同。因得刊正谬句。董君道力劝成之。且从诸朝士以资募工。大夫闻者。皆乐见助。四明楼君常愿终承其事。呜呼。如来云。无法可说是名说法。夫可见于言语文字者岂佛法之真谛耶。然非言语文字。则真谛不可得而传也。学者因六祖口诀以求金刚经。因金刚经以求见自佛性。见自佛性。然后知佛法不止于口诀而已。如此则六祖之于佛法。其功可思议乎哉。或者以六祖不识字。疑口诀非六祖所作。譬夫大藏经。岂是世尊自作耶。亦听法者之所传也。或六祖言之。而弟子传之。吾不得而知也。苟因口诀可以见经。何疑其不识字也。

元丰七年六月十日天台罗适谨序